

إِنَّ الدِّينَ عِنْدَ اللَّهِ الْإِسْلَامُ



لَا إِلَهَ إِلَّا اللَّهُ مُحَمَّدٌ رَّسُولُ اللَّهِ

# *K*hutba Jummah

**HADHRAT MUHYI-UD-DIN AL-KHALIFATULLAH**

*Munir Ahmad Azim*

10 Mars 2017

(10 Jamad'ul Aakhir 1438 AH)

***Après ki li fine salué tous so bane disciples (et tous bane musulmans) dans le monde entier avec la salutation de paix dans l'Islam, Hazrat Muhyi-ud-Din Al-Khalifatullah (atba) fine lire Tashahhud, Ta'uz, et Surah Al Fatiha, et li fine ensuite axé so Khutba Jummah lor « Vine Muttaqi »:***

*Alhamdulillah, Summa Alhamdulillah* aujourd'hui faire 9 ans depuis ki nous Jamaat - Jamaat Ul Sahih Al Islam fine officiellement enregistrer auprès de bane l'autorité - au niveau pays. D'ailleurs, dans deux jours - le 12 Mars, Maurice aussi pour fête so 49 ans d'indépendance (1968-2017). De ce fait, 9 ans (et même avant sa même, depuis la fin de l'année 2000) fine passer couma ene di vent de révolution spirituel ki fine faire nous encore et encore trouve la grâce d'Allah ki répanne en grande quantité lor nous, lor le Jamaat ki Allah même fine élever pour faire So travail de par le monde en entier. *Alhamdulillah, Summa Alhamdulillah.* Nous remercier Allah beaucoup pour sa faveur immense ki Li fine accorde moi personnellement, comme So humble serviteur et messenger, et zot tous ki trouve dans le Jamaat Ul Sahih Al Islam parski sakaine d'entre zot ena ene travail bien important dans le plan d'Allah. Mais pour sa, zot tous sans exception de par le monde, zot bizin faire bane zeffore immense et bane grand sacrifices pour ki bane décrets d'Allah réaliser et ki nous tous ensemble nous trouve bane victoires ki Allah fine promette nous. D'ailleurs, par la grâce d'Allah, avec bane jours et l'années ki pé passer, nous pé trouver par la grâce immense d'Allah couma Allah pé ouvert pour nous sa la porte là pour ki nous remporte sa victoire là et nous faire Li plaisir dans nous zeffore pour soumettre à So volonté, arrive séki arrive.

Ene kitchose ki normalement paraite difficile, li capave être réalisé avec facilité si ena la volonté. La volonté li vine à partir l'intérêt ki veut dire ki si pas ena volonté aussi, alors en conséqance, facile aussi pour vine difficile. Nous pou remarquer, kitchose ki nous capave faire pour sa lémonde ici-bas là (*Duniya*) nous pas pé capave faire sa pour nous *Deen*. Nous accepter pour faire sacrifice pour *Duniya*. Nous accepter pour lève bonne heure et marche ene long boute pour prend bus pour alle travail, mais nous trouve sa bien lourd et boucou dure pour vine *Masjid* et pourtant *Masjid* li trouve à côté nous la caze. Si nous analyse sa deux-là en terme facilité nous pour trouver ki bien pli facile pour vine *Masjid* ki alle travail. Mais nous faire li à cause nous trouve nous l'intérêt là-dans. Et vine *Masjid* li bien facile mais nous pas casse la tête avec sa parski nous pas conne so l'importance.

Dans ene Hadith, *Nabi Kareem* (saws) fine dire ki bane hypocrites si zot ti conné ki bénéfice ena dans faire Namaz Esha & Fajr dans *Masjid*, alors sans doute zot pour donne zot présence kan même zot ti bizin rampé pour faire li.

Donc, l'essentiel dans tous sa là c'est développe l'amour pour Allah Ta'ala ki pour créer l'intérêt de *Deen* et *Aakhirat* dans nous et sa à son tour pour amène la volonté voulu pour pratique *Deen*.

Après sa nous pas pour trouve nannié difficile ou ridicule ou bien illogique dans *Deen*. Nous pour considère sa façon de vivre là ene façon préconisé et apprécié par nous vrai Bien-Aimé, nous Allah Ta'ala. Le développement de l'amour pour Allah Ta'ala li pas vine ene seul coup. Bizin faire ene façon pour gagne li. Nous gagne li à travers nous l'engagement avec certaine pratique de *Deen*. Nous faire zeffore pour faire *Zikrullah* en forme bane *tasbeehaat* (*tasbihs*), *Darood Shareef* et *Istigfaar*. Nous faire ene manière faire li tous les jours. Nous bizin tire ene létemps pour faire *Telawat-e-Quran*.

Ene de bane kitchose bien efficace c'est fréquente bane *Deendaar* (bane dimounes pieux, ki dans *Deen*); pas fréqante bane ki pas ena connection avec Allah, ki nek attacher avec bane plaisirs de sa lé monde là, comme-ci dirai zot fine reste attacher avec sa lé monde là. Zot penser ki zot pour vive éternellement, même si ene lipié dans *Qabar* (tombe) ene lipié lors la terre, li encore pé faire tous zeffore pour augmente dibien de sa lémonde ici-bas là, kan li conne très bien ki demain kan la cloche la mort pour sonnè li pou bizin quitte tous sa là ici-même, nannié li pas pour charrié avec li, c'est seulement so bane actions ki li pou amène avec li.

Sa qualité dimoune là pas réfléchi lors zot la mort ki pour arrive zot après zot la mort et zot continuer même faire ditort zot camarade, et faire toute sorte qualité trick ou magouille pour gagne dibien de sa le monde là pliss et zot vine bane dimounes ki zot possède tous, et zot manifester avec bane tel l'arrogance ki zot traite bane les autres dimounes (bane ti

dimounes, bane pauvres) avec dégoût et zot pas penser ki tous séki zot possédé là, c'est Allah même ki fine donne zot tout sa et nannié pas pou zot et tous pour révine pou Allah Ta'ala. Tous zot la vie lors la terre vine ene gaspillage kot pas fine ena aucaine progrès spirituel.

Donc, ene croyant li sa dimoune ki pé faire beaucoup zéffore pour ki so Rab content avec li et pardonne li pour so bane faiblesses, so bane fautes. Donc, c'est ene conseil ki pé donne zot, reste en compagnie bane *Deendaar*, c'est le moyen le plus efficace pour gagne l'amour d'Allah Ta'ala. Après ene certaine temps, sa bane pratique-là pour rentre dans nous système ki nous pas pou senti nous à l'aise tanque pas faire li (c'est-à-dire, pratique *Deen*). C'est le point kot nous capave dire ki nous lé cœur fine commence connecter avec Allah Ta'ala. Dans ou bane fréquentation ou bizin guette bien; sa aussi li très important attention ou fréquente ene *faasiq*. Ene *faasiq* c'est ene dimoune ki commette ene péché majeur.

Dans la même façon, ene dimoune ki persister lors ene péché mineur aussi li vine ene *faasiq*. Ene dimoune li dénigré li-même par commette péché et li ranne li indigne. Li montrer li ki li sans pudeur. Acoze sa, ene dimoune semblable so témoignage li pas acceptable. Li bien chagrinant ki ene dimoune ki capave être ene honorable dans lizié dimoune mais li péna valeur dans lizié Allah Ta'ala.

Vrai l'honneur c'est sa l'honneur ki ene dimoune ena dans lizié Allah Ta'ala. C'est ene l'honneur ki rester et ki dans sire. De ce fait, véritable dimoune honorable li pas sa dimoune ki dimounes prend li lors zépaul en triomphe, mais c'est ene *Muttaqi* ou bien ene dimoune ki sincère et bien sérieux dans *Deen*. Ene dimoune sérieux dans *Deen* c'est ene dimoune ki assume so devoir envers so Créateur et so semblable selon bane principes enseigner par *Rassoollullah* (saws). Céki ene dimoune li chercher dans *Duniya* à travers so bane zéffore li capave gagne li dans ene façon pli efficace par être *Muttaqi*. Parski Allah Ta'ala fine promette pour accorde ene la vie très agréable à celui ki pratique So *Deen*. Li fine donne li l'assurance ki Li pou résoudre so bane problèmes et Li pou accorde li séki li bizin dans ene façon ki li pas attane. Nannié pas impossible ou difficile pour Allah Ta'ala. Li ena capacité faire difficile vine facile. Impossible vine possible. Li ena capacité faire défavorable vine favorable. Tout séki nous bizin, li trouve dans la main d'Allah Ta'ala. Ena ene seul façon pour gagne sa. Necque vine *Muttaqi*. Après sa, tout pour dans l'ordre.

Gloire à Celui ki ena contrôle de tout kitchose. En vérité, tous kitchose trouve uniquement dans So la main. O Allah, honore nous par garde nous dans To soumission. Et pas ranne nous malheureux par To désobéissance. *Ameen*.